

Na osnovu člana 16. stav (4) Zakona o Vladi Zeničko-dobojskog kantona - Prečišćeni tekst („Službene novine Zeničko-dobojskog kantona“ broj: 7/10 i 3/23), na prijedlog Ministarstva za rad, socijalnu politiku i izbjeglice, Vlada Zeničko-dobojskog kantona, na 56. sjednici, održanoj dana 22.11.2024. godine, d o n o s i

ZAKLJUČAK

I.

Prihvata se mišljenje Ministarstva za rad, socijalnu politiku i izbjeglice Zeničko-dobojskog kantona broj: 09-30-5174-5/24 od 08.11.2024. godine u vezi s Inicijativom Behije Kulović, poslanice u Skupštini Zeničko-dobojskog kantona, za donošenje Prijedloga Zakona o izmjeni Zakona o zaštiti od nasilja u porodici Federacije Bosne i Hercegovine.

II.

Zaključak s Mišljenjem iz tačke I. ovog zaključka upućuje se u dalju skupštinsku proceduru.

III.

Zaključak stupa na snagu danom donošenja.

Broj: 02-_____/24
Datum, 22.11.2024. godine
Zenica

PREMIJER
po ovlaštenju

Dženana Čišija

DOSTAVLJENO:

1x Ministarstvo za rad, socijalnu politiku i izbjeglice,
1x Stručna služba Skupštine,
1x a/a.



ZENIČKO-DOBOJSKI KANTON

STRUČNA SLUŽBA SKUPŠTINE
n/r Predsjedavajući Skupštine

STRUČNA SLUŽBA VLADE
n/r Premijera
n/r Sekretara

Broj: 09-30-5174-5/24
Zenica, 08.11.2024. godine

PREDMET: Mišljenje o poslaničkoj inicijativi - daje se;

Postupajući po aktu Stručne službe Skupštine broj: 01-02-5174/24 od 15.03.2024. godine i aktu Stručne službe Vlade Zeničko-dobojskog kantona broj: 02-1-5174-1/24 od 28.03.2024. godine u vezi s prijedlogom Behije Kulović, poslanice u Skupštini Zeničko-dobojskog kantona, za podnošenje Inicijative od strane Skupštine Zeničko-dobojskog kantona za donošenje prijedloga Zakona o izmjeni Zakona o zaštiti nasilja u porodici FBiH, s ciljem pooštavanja kaznenih odredbi predmetnog zakona, Ministarstvo za rad, socijalnu politiku i izbjeglice Zeničko-dobojskog kantona daje sljedeće:

M i š l j e n j e

Predmetnom inicijativom predlaže se da Skupština Zeničko-dobojskog kantona podnese Inicijativu za donošenje prijedloga izmjena Zakona o zaštiti nasilja u porodici Federacije Bosne i Hercegovine („Službene novine Federacije BiH“ broj: 20/13 i 75/21), s ciljem pooštavanja kaznenih odredbi ovog Zakona iz razloga što važeći Zakon o zaštiti nasilja u porodici FBiH predviđa novčane kazne u rasponu od 1.000,00 do 1.500,00KM za osobe koje ne postupe prema izrečenoj zaštitnoj mjeri. Ovako niskim kaznama se ne uspijeva postići efekat odvraćanja od ponavljanja nasilja.

Inicijativa se temelji na zaključku da postojeće novčane kazne nisu dovoljno visoke da bi djelovale kao efikasan alat za prevenciju i sankcionisanje prekršaja vezanih za nepoštivanje zaštitnih mjera. S obzirom na ozbiljnost i opasnost koju nasilje u porodici predstavlja za žrtve, kao i na potrebu za zaštitom njihovih prava i sigurnosti, predlaže se povećanje visine kazni.

Cilj je postići veću odgovornost počinitelja, uvesti strožije mjere odvraćanja, te u konačnici povećati učinkovitost Zakona o zaštiti od nasilja u porodici FBiH, kako bi se osigurala bolja zaštita žrtava i smanjio broj slučajeva ponovnog nasilja.

Ministarstvo za rad, socijalnu politiku i izbjeglice Zeničko-dobojskog kantona razmotrilo je predloženu inicijativu poslanice Behije Kulović i cijeni njen značaj u kontekstu jačanja zaštite

žrtava nasilja u porodici. Svjesni smo da postojeće kaznene mjere, poput novčanih kazni u iznosu od 1.000,00 do 1.500,00KM, možda nisu dovoljno učinkovite u prevenciji nasilja i u odvratanju počinitelja od ponovnog nasilnog ponašanja, ali smatramo da bi pooštavanje kaznenih sankcija trebalo biti samo jedan dio šireg zakonskog okvira koji uključuje i preventivne mjere, podršku žrtvama, te obavezne rehabilitacijske programe za počinitelje nasilja.

Međutim, u ovom kontekstu važno je napomenuti da trenutno ne smatramo opravdanim pripremu prijedloga za podnošenje predmetne inicijative, s obzirom na to da je u proceduri izrada novog Nacrta zakona o zaštiti od nasilja u porodici na nivou Federacije BiH, koji je nastao kao rezultat saradnje Komisije za ravnopravnost spolova i nevladinih organizacija.

Njegovo predstavljanje na proširenoj sjednici Komisije, dana 20.06.2024. godine, pokazatelj je ozbiljnosti pristupa ovom važnom pitanju. S obzirom na to da je novi Nacrt zakona već u fazi razmatranja i usklađivanja, smatramo da bi podnošenje inicijative za izmjenu postojećeg zakona moglo stvoriti dupliciranje napora i usporiti već započeti proces. Novi Nacrt zakona predviđa obuhvatanje promjene, uključujući i pooštavanje kaznenih odredbi, te je stoga opravdano sačekati završetak njegove procedure i eventualno usvajanje prije nego što se krene s daljim izmjenama postojećeg zakonodavstva.

Saradnja između relevantnih institucija, komisija i nevladinih organizacija, koja je dovela do izrade ovog Nacrta, predstavlja ključni korak ka donošenju sveobuhvatnog zakonskog rješenja. Ovaj pristup ne samo da će bolje odgovoriti na potrebe žrtava nasilja u porodici, već će također osigurati usklađenost s modernim standardima zaštite ljudskih prava.

Uzimajući u obzir ove činjenice, smatramo da je opravdano sačekati završetak procedure razmatranja i usvajanja novog zakona, kako bi se osigurao temeljit i koordiniran odgovor na problem nasilja u porodici.

S poštovanjem,

MINISTAR

Antonio Šimunović

Dostavljeno:

1x Naslov

1x a/a



Bosna i Hercegovina, Zenica, Kučukovići br. 2
Telefon: 032/460-680; Fax: 032/460-682; e-mail: min.rad@zdk.ba